

Noticia
Transparente
di Gobierno

ISLA ONLINE

Dialuna 5 Februari 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes



PROME MINISTER

Evelyn Wever-Croes

4 di februari, Dia Mundial di conscientisacion di Cancer: CONSCIENTISACION TA E PROME PASO PA TRIUNFO RIBA E ENEMIGO AKI

Diadomingo 4 di februari tawata Dia Mundial di conscientisacion di Cancer. Rond mundo, e yamada pa accion di conscientisacion a resona pa inspira tur nacion pa para uni contra cancer y crea un cultura di empatia, curashi y determinacion. Prome Minister Evelyn Wever-Croes ta encurasha Aruba henter pa para hunto den e lucha contra cancer pasobra nos forsa ta den union.

Cancer no conoce frontera, e no ta discrimina pero tampoco e potencia di e determinacion di e union di cada ciudadano pa ta conscientisa tocante e malesa aki y e cuido di salud. Hunto un nacion por trece cambio positivo den bida di esnan afecta pa e malesa desastroso aki. Pa haci esaki, cada ciudadano mester haci pa nan mes un obligacion y un costumber pa yuda pa detecta cancer tempran y na tempo pa nan mes. Biba un bida saludabel ta e prome recomendacion pa logra esaki. Tambe nos mester brinda sosten na personanan cu ta pasando den tratamento como tambe na nan famia. Importante ta tambe pa nos ta atento pa conscientisa tocante prevencion y deteccion tempran, pasobra conscientisacion ta e prome paso pa triunfo riba e enemigo aki.

“Aruba, laga nos ta e sosten, compacion, y forsa pa esnan cu ta enfrenta e desafionan di cancer. Hunto nos por crea un futuro unda cu e palabra cancer ta bira e sinonimo di curashi, triunfo y sigur tambe di cura”, Prome Minister a expresa.

Prome Minister ta gradici tur fundacion y organisacion na Aruba cu ta trahando incansabelmente den cuido y conscientisacion di cancer. “Boso pasion y dedicacion ta ilumina e caminda di speransa, enfocando no solamente pa yuda pashentnan cu cancer pero tambe pa salba bida di



hopi persona. Cancer ta un malesa cruel cu no ta discrimina. E por bati na nos porta cualkier momento. Prevencion te ainda ta e unico arma. Cada esfuerzo, cada gesto, ta reforsa nos determinacion, y ta recorda nos cu den union, nos ta crea un futuro mas briyante”, Prome Minister a enfatisa. ■



MINISTER

Geoffrey Wever

PRIME PASO PA TRAHA UN KOOPKRACHTMODEL PA ARUBA



Awe 5 di februari 2024 Minister Geoffrey Wever y Departamento di Asuntonan Economico di Aruba a tene un reunion digital cu Economisch Bureau Amsterdam riba e proyecto pa traha un “koopkrachtmodel”.

Un “koopkrachtmodel” ta un instrumento di maneho pa midi e posibel impacto di maneho riba e poder di compra di hogarnan na Aruba. Pais Aruba actualmente no ta dispone di un modelo asina.

E proyecto ta consisti di dos fase. E prime fase ta encera traha e modelo y lo tin un duracion di 9 siman. Fase dos ta trata di ofrece training na di Departamento di Asuntonan Economico, Comercio y Industria den uzo di e “koopkrachtmodel”.

Durante e reunion cu Economisch Bureau Amsterdam a elabora ampliamente riba e cuatro stapnan necesario pa traha un “koopkrachtmodel” pa Aruba. E prime stap ta pa defini un cantidad di hogarnan, “voorbeeldhuishoudens” cu ta un refleho di tur hogarnan na Aruba. Despues Economisch Bureau Amsterdam lo inventarisa e maneho relevante existente di

Aruba cu ta afecta e poder di compra. Di tres stap ta determina e ingreso disponibel pa e hogarnan aki. Por ultimo lo combina e stapnan aki cu e desaroyo di inflacion y salarionan. Economisch Bureau Amsterdam ta premia di tin un prime version di e “koopkrachtmodel” den luna di maart.

Un meta importante di maneho economico ta pa mehora e poder di compra di tur ciudadano. Pa logra e mehoracion di poder di compra ta necesario pa tin un instrumento manera e “koopkrachtmodel”. Un “koopkrachtmodel” ta haci posibel pa na un manera efectivo implementa maneho cu un impacto positivo riba e poder di compra na Aruba. Como instrumento di maneho, e “koopkrachtmodel” lo contribui na mehoracion di e poder di compra.

“Ta importante cu como Pais nos aloca e fondonan necesario pa yega na un “koopkrachtmodel”. Ta un inversion necesario cu lo aporta na tuma decisionnan responsabel y cu un impacto positivo riba e poder di compra na Aruba, segun minister Geoffrey Wever.



PREMIO EXCELENCIA DEN DEPORTE TA TUMA LUGA DIA 19 DI APRIL PROXIMO

Ta reconoce e atletanan cu a destaca den aña 2023



Recientemente, comision organisado di Premio Excelencia den Deporte a reuni cu Minister Endy Croes, unda cu a presenta e grandioso evento cu ta tuma lugá den luna di april proximo. E comision ta den pleno preparacion pa e anochi di gala mas anticipa den deporte di Aruba. Durante e ceremonia di gala aki, lo reconoce e atletanan cu mas a destaca den nan disciplina pa aña 2023. Tambe, lo reconoce e entrenadonan pa nan contribucion den e desaroyo di deporte di nos pais. Banda di esaki, lo rindi homenahe na e baluartenan deportivo cu a dedica gran parti di nan bida na desaroyo di deporte di Aruba.

Ademas di esaki, cinco (5) atleta olimpico lo ricibi un certificado y pin for di World Olympians Association pa nan esfuerso haci pa promove e balornan olimpico. E comision ta den pleno preparacion pa organisa un bes mas un evento magistral pa nos deportistanan.

Mandatario di Deporte ta recorda y pidi cooperacion di tur federacion deportivo pa entrega nomber di nan nominadonan na tempo. Den e simannan nos dilanti Pueblo di Aruba lo ricibi mas informacion di e anochi di gala mas grandi den deporte di Aruba. ■■■

Minister Endy Croes:

A REUNI CU PLATAFORMA 1 UNDA A TRATA DIFERENTE PUNTO DI INTERES ENCUANTO ENSEÑANSA PA AÑA 2024



Diahuebs ultimo, Minister Endy Croes a atende e reunion di Plataforma 1. Plataforma 1 ta consisti di e dies (10) schoolbesturen, minister di Enseñansa, Departamento di Enseñansa y expertonan di e veld, entre otro, Duos. E reunion aki ta tuma luga un (1) bes den seis siman, unda cu ta bini hunto pa trata e temanan comun riba e tereno di enseñansa. Minister Endy Croes a duna un splicacion di e Doorlichting Rapport y e diestres (13) recomendacionnan.

A repasa kico tur a haci caba y kico lo haci den aña 2024, pidiendo cooperacion di e veld pa duna nan contribucion den esaki pa tin un (1) solo linea pa sirbi e interes general. Banda

di esaki, Minister Endy Croes a ricibi un sorpresa agradabel cu Sra. Mabel van Houten, kende ta representante di Onderwijs, Cultuur en Wetenschap (OCW) di Hulanda ta dos (2) dia na Aruba y a forma parti di e reunion aki. Sigur Sra. van Houten ta un parti crucial den e relacion cu Hulanda riba e tema di enseñansa.

Concluyendo, Minister Endy Croes a enfatisa cu e tabata un bon reunion y un bon inicio unda cu Departamento di Enseñansa a duna un presentacion amplio di e avancen y loke lo sosode encuan to di enseñansa den su totalidad.

MINISTER ENDY CROES TA FELICITA E ALUMNO – Y MAESTRONAN CU UN BUNITA Y EXITOSO PARADA ESCOLAR 2024 NA ORANJESTAD



Diabierna mainta, Minister Endy Croes a presencia Parada Escolar 2024 di e scolnan preparatorio y basico di Playa. E parada a sali for di veld Cricket, pasa den e cayanan di Oranjestad y termina na veld di RCA. Un total di diesdos (12) scol parti den cinco (5) grupo a participa den Parada Escolar. Tabata reina un ambiente fenomenal.

Un publico sumamente grandi a disfruta di e parada cu hopi zjeito y un ambiente total. Un mainta yena cu energia, creatividad, color y musica. Nos muchanan a gosa di nan parada. Minister Endy Croes ta manda palabra di elogio na tur alumno, maestro y mayor di e scolnan cu a participa den e parada aki.

Tambe, mandatario di Enseñansa y Deporte ta gradici e scolnan, comision organizado y tur esnan cu a contribui pa haci e parada aki posibel y super exitoso. Danki pa engrandece Aruba su Carnaval 70. Minister Endy Croes ta desea Aruba un dushi temporada di Carnaval 70. Ban celebr'e conscientemente! ■







Gabinete Wever-Croes

Murayanan na San Nicolas, cu un tempo tawata silencioso y senciyo, a bira inspiracion pa creatividad dinamico di varios artista. Cada arte di muraya ta un celebracion di diversidad, cultura y union, dunando bida na murayanan y transforma nan den obranan maestro.

2024

AÑA DI STABILIDAD Y PROSPERIDAD